

**Kalaallit Nunaanni imartap killeqarfiata 3 smil-iniit 12 smil-imut annertusineqarsinnaananik periarfissat misissorneqarnissaanik kiisalu tamatuma inatsisitigut, aningaasaqarnikkut inuussutissarsiornikkullu kingunerisassai pillugit nassuiaateqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut. Misissuineq Inatsisartut UPA2028-mut saqqummiunneqassapput**

*Inatsisartunut ilaasortaq, Jens Naptk', Naleraq*

**pillugu**

**Inatsisinut Ataatsimiititaliap**

**siunnersuutip aappassaaneerneqarneranut**

**ISUMALIUTISSIISSUTAA**

Ataatsimiititaliap suliarinninnermini uku inuttarai:

Inatsisartunut ilaasortaq Aqqalu C. Jerimiassen, Atassut, siulittaasoq  
Inatsisartunut ilaasortaq Kuno Fencker, Naleraq, siulittaasup tullia  
Inatsisartunut ilaasortaq Karen-Marie Kyed Frederiksen, Demokraatit  
Inatsisartunut ilaasortaq Bo Martinsen, Demokraatit  
Inatsisartunut ilaasortaq Nivi Rosing, Inuit Ataqtigiit

UPA2026-mi 30. april 2026 siullermeerinninnerup kingorna ataatsimiititaliap siunnersuut misissorpaa.

### **Siunnersuutip imarisaa siunertaalu**

Siunnersuut akuerineqarpat Kalaallit Nunaanni imartap killeqarfiata 3 smiliniit 12 smilimut annertusineqarsinnaaneraniq periarfissat misissoqqullugit Naalakkersuisut peqquneqassapput. Taamatuttaaq tamatuma inatsisilerinikkut, aningaasaqarnikkut inuussutissarsiorinikkullu kingunerisassai Naalakkersuisut misissuinerminni aamma nassuiaatigissavaat. Misissuineq UPA2028-mi Inatsisartunut saqqummiunneqassasoq siunnersuutigineqarpoq.

### **Siunnersuutip Inatsisartunit siullermeerneqarnera**

Siunnersuut siullermeerneqarmat misissuinermit taamaattumik suliaqarnissaq ataatsimut isigalugu taparserneqarpoq, tassa aalajangiinerit paasissutissanik tunngaveqarluarluni pisarnissaat isumaqatigiiffiulluarmat.

Taamatuttaaq siunnersuut suliassaqarfimmut pisariullunilu pissutsinut amerlasuunut tunngassuteqartoq isumaqatigiiffiulluarpog. Tamanna tunngavigalugu pingaartumik aningaasaqarnikkut allaffissornikkullu kingunerisassat misissorneqarnissaat pingaaruteqartoq arlallit erseqqissarpaat.

Partiip ataatsip siunnersuut tamakkiisumik taparserpaa aammalu piffissap misissuinerit atornerqartussap missingerneqartuarnissaa pingaartillugu. Allatulli missingiilluni piffissaliinissap ataatsimiititaliamit oqaluuserineqarnissaanera ajoriffissaqartinnagu.

Nunanut Allanut Naalakkersuisoqarfik misissuinerup ingerlanneqarnissaanut pisariaqartinneqartunik maannangaaq sulisoqannginnera Naalakkersuisunit erseqqissaatigineqarpoq. Tamatumani ilaatigut tunngaviulluni nunatta nunanut allanut naalakkersuinikkut maanna inissisimanera. Kiisalu Naalakkersuisunit aamma erseqqissaatigineqarpoq imartap killeqarfiata annertusineqarsinnaanera Nunatta Nunanut Allanut, Sillimaniarnermut Illersornissamullu Politikissaanut Periusissiaa naapertorlugu oqallisigineqarlunilu misissorneqassasoq.

Tamanna tunngavigalugu allannguutissatut siunnersuut imaattoq Naalakkersuisunit saqqummiunneqarpoq:

***”Kalaallit Nunaanni imartap killeqarfiata 3 smil-iniit 12 smil-imut annertusineqarnissaanut periarfissanik, tamatumalu inatsisitigut, aningaasaqarnikkut inuussutissarsiorinikkullu kingunerisassaanik misissuinissamut Naalakkersuisut peqquneqarput.”***

Naalakkersuisut allannguutissatut siunnersuutaat amerlanerussuteqartunit maannangaaq taparserneqarpoq, tamatumali ataatsimiititaliami oqaluusereqqinneqarnissaa kissaatigineqarluni.

Tamakku tunngavigalugit siunnersuut ataatsimiititaliamit suliarineqartussanngorlugu innersuunneqarpoq.

### **Siunnersuutip aningaasaqarnikkut kingunerisassai**

Aalajangiiffigisassatut siunnersuutit piviusunngortinneqarneranni aningaasaqarnikkut allaffis-sornikkullu kingunerisassat siunnersuutip tunngavilersuutitaani nassuiaatigineqartassasut Inatsisartut suleriaasianni § 33, imm. 1-imi allassimavoq.

Tamanna naapertorlugu siunnersuut piviusunngortinneqarpat aningaasaqarnikkut kingunerisassat nalunaarneqarsimasut ataatsimiititaliamit maluginiarneqarpoq, taamaalilluni taakku ukioq naallugu AC-fuldmægtigitut atorfinnut marlunnt naapertuunnissaat naatsorsuutigineqarluni, tassa imaappoq 1.000.000 kr.-inut.

### **Nunanut Allanut, Inuussutissarsiornermut Aatsitassanullu Naalakkersuisup ilisimatitsiffiusumik ataatsimeeqatiginera**

Siunnersuummik suliarinninnermut atatillugu ataatsimiititaliap Nunanut Allanut, Inuussutissarsiornermut Aatsitassanullu Naalakkersuisoq ilisimatitsiffiusumik ataatsimeeqatigaa, tamatumani ataatsimiititaliaq apeqqutinut arlalinnut akissuteqarfigineqarluni.

### **Ataatsimiititaliap siunnersuummut oqaaseqaatai**

Misissuinerup suliaqarnissamik siunnersuutikkut siunertarineqartoq tapersorsorluartoq ataatsimiititaliamit oqaatigineqassaaq.

Kiisalu Naalakkersuisut misissuinerup taamaattumik ingerlatsilersaareerlutik oqaatigigaat ataatsimiititaliamit aamma oqaatigineqassaaq.

Taamatuttaaq Naalakkersuisut allannguutissatut siunnersuutaat misissuinerup tunniunneqarnissaanut killiliussamik imaqqangitsoq ataatsimiititaliamit maluginiarneqarpoq, tamannalu misissuinerup pisariunerup kiisalu pingaartumik Nunanut Allanut Naalakkersuisoqarfimmi sulisoqarnikkut maanna pigineqartunik tunngaveqartinneqartoq.

Ataatsimiititaliamilli oqaatigineqassaaq Nunatta Nunanut Allanut, Sillimaniarnermut Illersornissamullu Politikissaanut Periusissiaani: “NUNARPUT NUNARSUARMI — Pineqartilluta ilaassaagut”, piffissaliussap 2024-2033 atuuttussap iluani misissuinerup aallartinneqarnissaa Naalakkersuinit naatsorsuutigineqarmat.

Nunatta nunanut allanut naalakkersuinikkut maanna inissisimanera – sulisutigut allaffisornikkullu nukissat atorneqarsinnaasut ilanngullugit – misissuinerup

ingerlanneqarnissaanut piffissaliisinnaanermut immikkut isiginiarneqarsimasutut ataatsimiititaliamit naatsorsuutigineqarpoq.

Taamatuttaa q imartaq pillugu inatsiseqarnikkut suliassa qarfiup isumagineqarneranut atatillugu ataatsimiititaliamit oqaatigineqassaaq Kalaallit Nunaanni nunap toqqaviinut piumasaqaatit saqqummiunneqarnerannut tunngatillugu maannangaaq oqimaatsumik suliassa qareersoq. Tassa Naalagaaffiit Peqatigiit Nunaviup toqqaviisa killeqarfii pillugit Ataatsimiititaliarsuani isumaqatiginninniarnernik Kalaallit Nunaata kunngeqarfik sinnerlugu siuttuummat.

Tamanna tunngavigalugu misissuinerup UPA2028-mi naammassineqarnissaa pisariaqartinneqarnerosoq imaluunniit misissuinerup periusissiap massakkumit 2033-p naanissaata tungaanut atuunnerani naammassineqarnissaa pitsaaquteqassanersoq ataatsimiititaliamit oqaluuserineqarpoq.

### **Ataatsimiititaliap inassuteqaatai**

- Naalakkersuisut allannguutissatut siunnersuutaat akuerineqassasoq ataatsimiititaliami amerlanerussuteqartut Demokraatit, Inuit Ataqatigiit Atassutillu inassutigaat.
- Siunnersuutaqqaartoq akuerineqassasoq ataatsimiititaliami ikinnerussuteqartup Naleqqap inassutigaa.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-  
luni siunnersuut aappassaaniigassanngortippaa.

---

Aqqalu C. Jerimiassen  
Siulittaasoq

---

Kuno Fencker  
Siulittaasup tullia

---

Karen-Marie Kyed  
Frederiksen

---

Bo Martinsen

---

Nivi Rosing